

Morning Dogri (NSD) National News Bulletin 04-02-2025

आकाशवाणी

- संसद च राष्ट्रपति हुंदे अभिभाषण उपपर धन्नबाद प्रस्ताह पर चर्चा जारी ऐ।
- 70 मिनबरी दिल्ली विधानसभा च कल होने आले चुनाएं गी सुचारु रूप कन्नै संपन्न करोआने आस्तै सब्बने बंदोबस्त करी लेते गे न।
- केन्द्री गृहमंत्री अमित शाह होर अज्ज जम्मू कश्मीर च विकास ते सुरक्षा दा जायजा लैंगन।
- भूटान नरेश जिग्मे खसर नामग्याल वांगचुक होर अज्ज महाकुंभ त्रिवेणी संगत च पवित्र स्नान करगंन।
- अमरीका दे राष्ट्रपति डोनाल्ड ट्रंप होरें चीन, कनाडा ते मैक्सिको पर बाद्ध अमरीकी शुल्क दे अज्ज लागू होने गी इक म्हीने तोड़ी टाल्ली दित्ता ऐ।
- टेबल टेनिस च भारत दी मानुष शाह ते दिया चिताले दी जोड़ी दा अज्ज संजा सिंगापुर च विश्व टेबल टेनिस दे मिक्ड डबल्स प्री-क्वार्टर फाइनल मैच होग।

<><><><><><>

Motion Of Thanks

संसद दे दौनें सदनें च राष्ट्रपति हुंदे अभिभाषण पर धन्नबाद प्रस्ताह पर चर्चा अज्ज बी जारी रौहग। लोकसभा च कल बीजेपी दे सांसद रामवीर सिंह बिधूड़ी होरें धन्नबाद प्रस्ताह पेश करदे होई लोक-कल्याण दी योजनाएं सनें नरेन्द्र मोदी सरकार दियां उपलब्धियां गिनाइयां। उनें दिल्ली च आम आदमी पार्टी दी अगुवाई आली सरकार पर दिल्ली च आयुष्मान भारत ते प्रधानमंत्री आवास योजना जनेई केन्द्र सरकार दी योजनाएं गी लागू करने च थित तौर पर नाकाम रौहने पर नशाना लाया। श्री बिधूड़ी होरें दिल्ली सरकार पर झुगगी झोंपड़िएं दे हिते खलाफ कम्म करने दा बी आरोप लाया। उनें दिल्ली च इक जहार 7 सौ अवैध कॉलोनिंग दे निवासिएं गी स्वामित्व अधिकार देने आस्तै केन्द्र आस्सेआ पुट्टी गेदी गैह दा जिक्र कीता। नेता विपक्ष ते कांग्रेस दे सांसद राहुल गांधी होरें राष्ट्रपति हुंदे संबोधन दी निंदेआ करदे होई आखेआ जे एह पिछले बरें दा दोहराव गै ऐ हा ते एहदे च छड़ा सरकार दी उपलब्धिएं दा पुलिंदा पेश कीता गेआ ऐ। राहुल गांधी होरें बेरोजगारी दे मुद्दे पर चिंता जाहर करदे होई इस गल्ला पर जोर दित्ता जे देशै दा भविक्ख युवाएं दे हत्थे च ऐ। उनें आखेआ जे सकल घरेलू उत्पाद च विनिर्माण क्षेत्र दी साझेदारी घटपे पर बी सुआल पुट्टेआ। राहुन गांधी होरें आखेआ जे सरकार दी प्रमुख मेक इन इंडिया पैहल सैद्धांतिक तौर पर

शैल गैंह ऐ पर इसी सफलतापूर्वक लागू नेई कीता जाई सकेआ ऐ। होरनें सांसदेन बी चर्चा दरान अपनी गल्ल रखी। समाजवादी पार्टी दे नरेश चंद उत्तम पटेल होरें राष्ट्रपति हुंदे अभिभाषण च न्यूनतम समर्थन मुल्य एमएमपी गारंटी दा जिक्र नेई होने दी गल्ल रखी। तृणमूल कांग्रेस दी डॉ. काकोली घोष दस्तीदार होरें आरोप लाया जे राष्ट्रपति हुंदे अभिभाषण च खाद्य मेंहगाई ते कृषि ऋण गी माफ करने दी कोई गल्ल नेई कीती गई ऐ।

<><><><><><>

RS

राज्यसभा च बी राष्ट्रपति हुंदे आस्सेआ संसद दी सांझी सभा गी दित्ते गेदे अभिभाषण पर धन्नबाद प्रस्ताह लेई चर्चा शुरू कीती गई। चर्चा गी शुरू करदे होई बीजेपी दे सांसद किरण चौधरी होरें आखेआ जे सरकार नै करसानेन दी आमदन दोगुणी करने लेई केई सारी गैंह पुटिट्यां न। राई-बाई क्षेत्र लेई सरकार आस्सेआ कीते गेदे जतनें खलाफ गल्ल प्रचार अभियान चलाने पर विरोधी पार्टिएन दी नुखाचीनी करदे होई उनें आखेआ जे यूपीए सरकार नै डॉ. स्वामीनाथन कमेटी दी सिफारशें गी ठंडे बस्ते च पाड़यै रखेआ। विरोधी धड़ें दे लीडर ते कांग्रेस नेता मल्लिकार्जुन खरगे होरें बेरोजगारी, मेंहगाई ते अमरीकी डॉलर प्रति रपे दा कमजोर होने सरबन्धी मुद्दे पुट्टे। उनें आरोप लाया जे सरकार इस बरें 2 करोड़ नौकरियां देने सरबन्धीअपने वायदेन गी पूरा नेई करा'रदी ऐ। बैहस च हिस्सा लेंदे होई केन्द्री मंत्री पीयूष गोयल होरें श्री खरगे हुंदे इस आरोप दी मुखालवत कीती ते करसान आत्मनिर्भर होआ'रदे न।

<><><><><><>

Delhi Election

दिल्ली च कल 70 सदस्येन आली विधानसभा दे चुनां गी सुचारु ढंगे कन्नै संपन्न करोआने आस्तै सारे इंतजाम कीते जा'रदे न। मतदान कल बडलै 7 बजे थमां संजा 6 बजे तगर होग। इस दरान इक करोड़ 56 लक्ख थमां मते मतदाता 699 मेदवारें दे सियासी भागें दा फैसला करगन। इस सिलसिले च चुनां प्रचार कल संजा संपन्न होई गेआ। वोटें दी गिनतरी आला कम्म शनीवार होग। चुनां आयोग नै 5 फरवरी बडलै 7 बजे थमां संजा साढ़े 6 बजे तगर एग्जिट पोल पर पूरी चाल्ली पाबंदी लाई दित्ती ऐ। इस सरबन्धे च दिल्ली दे मुख्क चुनां अधिकारी हुंदे दफतरै आस्सेआ आदेश जारी कीता गेआ। अधिसूचना मूजब प्रिंट जां

इलैक्ट्रानिक मीडिया जां कुसै होर तरीके जेहड़ा बी होए व एग्जिट पोल ओपिनियन पोल जां कुसै होर चुनां सर्वेक्षण दे नतीजे पर पाबंदी रौहग।

<><><><><><>

HM Review Minister

केन्द्री गृहमंत्री अमित शाह होर अज्ज लगने आली इक उच्ची सतह दी बैठका च जम्मू कश्मीर दी सुरक्षा ते विकास स्थिति दी समीक्षा करगन। संसद दे नार्थ ब्लाक च लगने आली इस बैठका च जम्मू कश्मीर दे उपराज्यपाल मनोज सिन्हा हुंदे अलावा सिविल पुलस ते खुफिया विभाग थमां बड्डे अफसर बी शिरकत करगन। गृह विभाग दे वरिष्ठ अफसर ते थेआरबंद बलें दे अध्यक्ष बी मजूद होंगन। आकाशवाणी दे जम्मू संवाददाता नै जानकारी दित्ती ऐ जे बैठक च औंदे म्हीने दरान जदू पहाड़ें पर बर्फ पिघलना शुरू होई जंदी ऐ ते नियंत्रण रेखा ते अंतर्राष्ट्रीय बन्ने पर घुसपैठ दा खतरा बधी जंदा ऐ, दी सुरक्षा तैआरिएं ते प्रबंधें बारे चर्चा चेचे तौरा पर कीती जाग। सुरक्षा ते विकास सरबन्धी मुद्दें दे इलावा जिने होर विषयें पर सोच बचार होना ऐ, उंदे च मुखमंत्री हुंदे कैबनिट सदस्यें दे इख्तयारें गी केन्द्र शासत प्रदेश दे नियमें कायदें मूजब मुकदा रूप देना बी शामिल ऐ।

<><><><><><>

Mahakumbh

भूटान नरेश जिग्मे खसर नामग्याल वांगचुक महाकुंभ च हिस्सा लैने आस्तै अज्ज प्रयागराज पुज्जगन। ओह त्रिवेणी संगम पर पवित्र डुबकी लांगन। भूटान नरेश होर इस यात्रा दे सिलसिले च कल उत्तर प्रदेश दी राजधानी लखनऊ पुज्जे हे।

<><><><><><>

US-President

अमरीका दे राष्ट्रपति डोनाल्ड ट्रंप होरें मैक्सिको पर लगने आले अमरीकी शुल्क च बाद्धे गी 1 म्हीने आस्तै टाल्लदे होई कुसा कामयाबी समझोते दा संकेत दित्ता ऐ। उनें आखेआ जे उंदी मैक्सिको दी राष्ट्रपति हुंदे कन्नै गल्लबात होई ऐ तां ते अमरीका-मैक्सिको दे बन्ने पर गैर कनूनी घुसपैठ रोकने लेई 10 ज्हार सैनिक भेजने लेई तैआर ऐ। ट्रंप होरें आखेआ जे उंदी कनाडा कन्नै बी गल्लबात चला'रदी ऐ। उआं मैक्सिको थमां ओने आले समेयान उप्पर 25 फीसदी शुल्क, कनाडा थमां औने आले समेयान उप्पर बी 25 फीसद ते ऊर्जा स्रोत पर 10

फीसद दा शुल्क ते चीन थमां ओने आले समेयान उप्पर बाद्धू 10 फीसदी शुल्क इस मंगलवारें थमां लागू होना हा।

<><><><><><><>

Kulgam Attack

कश्मीर घाटी दे कुलगाम जिले च आतंकवादिएं दे इक हमले च इक साबका फौजी दी मौत होई गई ऐ ते ओहदी घरै आली ते धीह् जख्मी होई गेइयां। जिले दे बेहीबाग इलाके च आतंकवादिएं मंजूर अहमद नां दे साबका फौजी ते ओहदे परोआर पर गोलीबारी कीती। हमले दे परेंत इनें त्रौनें गी अस्पताल पजाया गेआ पर साबका फौजी दी रस्ते च गै मौत होई गई ही। सूत्रें जानकारी दित्ती ऐ जे पुलस, नीम फौजी बल ते फौज नै इलाके दी घेराबंदी करियै हमलावरें दी तुपाई लेई अभियान चलाए दा ऐ।

<><><><><><><>

Grammy Awards

भारती-अमरीकी मूल दिएं गायिका ते उद्यमी चंद्रिका टन्डन होरें'गी उंदी एल्बम 'त्रिवेणी' लेई ग्रैमी पुरस्कार हासल होआ ऐ। इस ऐल्बम च चंद्रिका होरें प्राचीन धुनें ते वैश्विक संगीत दा इक अनोखा मेल प्रस्तुत कीता ऐ। बड़ी मती प्रतिश्ठा आह्ले इस सम्मान दा ऐलान अमरीका दे लॉस एंजलिस च 67में सलाना ग्रैमी अवार्ड्स दरान कीता गेआ। प्रधानमंत्री नरेन्द्र मोदी होरें चंद्रिका टंडन होरें गी उंदी एल्बम त्रिवेणी लेई ग्रैमी अवार्ड हासल करने पर ममारकबाद दित्ती ऐ। सोशल मीडिया पोस्ट च टंडन हुंदी एह् उपलब्धि उंदी सगोसार सांस्कृतिक विरासत ते संगीत सरबंधी हुनर दी सराहना कीती।

<><><><><><><>

Table Tennis

थ्संगापुर च विश्व टेबल टेनिस दे प्री-क्वार्टर फाइनल च मानुष शाह ते दीया चिताले दी भारतीय मिक्स्ड डबल्स तोड़ी दा सामना मैक्सिको दे मार्कोस मैड्रिड ते अरांत्सा कासियो कन्नै होग।

<><><><><><><>